

"A D.O. Ribeira Sacra acadou que hostalería e consumidores aposten polo noso"

noticiasgalicia.- Este ano, por primeira vez, a Asociación Galega de Catadores e a Asociación de Sumillers de Galicia, Gallaecia, realizan de maneira conxunta as catas para os premios "EXCELENCIA 2010" que concede a A.G.C. e "DISTINCIONS GALLAECIA 2010" que concede a Asociación de Sumillers. Hoxe os viños protagonistas foron os da D.O. Ribeira Sacra, 18 catadores, entre unha asociación e outra, divididos en dous paneis de cata, cataron un total de 61 mostras, 13 delas de viño branco (1 mostra de barrica) e o resto de tintos (13 mostras de barrica)

Os resultados para os premios Excelencia 2010 da Asociación Galega de Catadores coñeceranse nos vindeiros días, con eses datos elabórase a Guía de Viños, Aguardentes e Adegas de Galicia que editará Edicións Xerais de Galicia. Obteñen a "Excelencia" os que acadan máis de 87 puntos sobre 100. Para os "Distinguidos Gallaecia" dos viños catados hoxe farase unha selección de mostras que pasará a unha cata final que se celebrará en agosto na provincia de Pontevedra.

Os viños da D.O. seguen mellorando ano a ano, era o balance que nos deixaban algúns dos catadores, tras probar os viños. "Cada vez fanse mellores viños nesta D.O., agora é necesario dar un salto para facelos diferentes. Técnicamente os viños están moi ben, conseguido esto hai que dar un paso máis, elaborar viños diferentes ao do veciño porque existe a base para que poidan ser diferentes, variedade de solos, de exposición ao sol....." Luis Paadín, Presidente da Asociación Galega de Catadores, quen continuaba "Os brancos cada ano están mellor. Os tintos teñen unha boca moi cómoda, nada agresiva, son viños moi feitos a estas alturas do ano nas que estamos, algo moi bo para os viños novos".

A xornada de cata, na sala de catas do Centro do Viño da Ribeira Sacra, deu tamén para coñecer impresións doutras D.O. sobre a D.O. Ribeira Sacra, en palabras de Luis Paadín, por exemplo, "A D.O. Bierzo admira á D.O. Ribeira Sacra pola súa capacidade comercializadora, o feito de vender toda a produción antes de que remate o ano. A D.O. Ribeira Sacra acadou que a hostalería e os consumidores aposten polo noso, éste é un dos principais éxitos da D.O. Ribeira Sacra." Quedamos á espera de coñecer os resultados da dobre cata de hoxe, mentres, xa sabemos o que deu de si a celebración das catas de viños tintos e viños brancos galegos en Euskadi, con motivo da celebración do día de Galicia en Euskadi.

A D.O. Ribeira Sacra obtivo o segundo premio en tintos co viño Don Ramón 2009 da adega Don Ramón S.L. (subzona de Quiroga Bibe). As D.O. Rías Baixas e Valdeorras levaron o resto de premios desta actividade que organiza a Irmandade de Centros Galegos en Euskadi coa colaboración da Asociación de Euskadi de Sumillers.